



Asunto: Implantación dos novos ciclos formativos de Formación Profesional Básica (FPB), cofinanciada no 80% polo FSE, no curso 2015-2016.

No Diario Oficial de Galicia do 16-06-2015 publicouse a Orde do 10 de xuño de 2015 pola que se actualiza a oferta de formación profesional do sistema educativo, polo réxime ordinario, en centros públicos da Comunidade Autónoma de Galicia para o curso académico 2015/16.

No preámbulo da referida norma cítase que os ciclos de formación profesional básica están cofinanciados polo Ministerio de Educación, Cultura e Deporte e o Fondo Social Europeo no marco do Programa Operativo de Emprego, Formación e Educación”.

Efectivamente, a implantación dos novos ciclos de FPB será cofinanciada polo Fondo Social Europeo, no marco do obxectivo temático 10 “Investir en educación, formación e formación profesional para a adquisición de capacidades e unha aprendizaxe permanente”, artigo 9 do Regulamento (UE) nº 1303/2013 do Parlamento Europeo e do Consello de 17 de decembro de 2013, polo que se establecen disposicións relativas aos fondos estruturais.

A dotación do FSE (80 %) será anticipada polo Ministerio de Educación, Cultura e Deporte con cargo ao referido Programa Operativo, correspondente ao período de programación 2014-2020. O Ministerio achegará tamén os fondos correspondentes ao cofinanciamento, polo 20 % restante.

Dende a Administración educativa débese garantir que, dende o inicio do curso escolar, estas medidas cumpren cos requirimentos regulamentarios dos procedementos de xestión do FSE para o período 2014-2020 e coas vixentes instrucións da Unidade Administradora do Fondo Social Europeo (UAFSE), co obxecto de garantir a elixibilidade dos gastos incorridos ao FSE. Os procedementos deben implantarse antes do desenvolvemento material das actuacións, aínda que non se aprobara o PO, nin que se tivera designado ao organismo intermedio, xa que así o esixe o Regulamento (UE) 1303/2013, nos seus artigos 65.6 e 125.3.

Unha das tarefas realizadas pola Consellería de Cultura, Educación e Ordenación Universitaria foi identificar as operacións que poden ser obxecto de cofinanciamento do FSE atendendo á programación da oferta da Comunidade Autónoma recollida na Orde do 10 de xuño de 2015. A operación defínese como un centro que imparte un ou varios grupos de primeiro de FPB ou un centro que imparte un ou máis grupos de segundo de FPB. Os centros que teñan cursos de 1º e 2º de FPB terán, polo tanto, dúas operacións.

Realizada a identificación das operacións, estas foron subidas á aplicación informática do Ministerio de Educación, Cultura e Deporte para a súa aprobación.

Unha vez estudadas as propostas de autorización de operacións e os seus criterios de selección, o Ministerio nos comunica que ese centro é unha operación seleccionada para implantar os novos ciclos formativos de FPB e que, polo tanto, vai ter financiamento para os gastos de profesorado e de funcionamento, achegado nun 80% polo FSE e nun 20% polos fondos propios do Ministerio.



Información e publicidade.

Os centros educativos informarán, ao comezo de cada curso escolar, a todos os alumnos e alumnas sobre a contribución dos fondos estruturais da Unión Europea á redución e a prevención do abandono escolar temperá e ao fomento da igualdade de acceso a unha educación infantil, primaria e secundaria de boa calidade, incluídos os itinerarios de aprendizaxe formais, non formais e informais encamiñados a permitir a reintegración no proceso de educación e formación.

Moi especialmente, informarase ao alumnado que curse ciclos formativos de Formación Profesional Básica, xa que os seus ciclos van financiarse nun 80% pola Unión Europea a través do Fondo Social Europeo.

Tamén se fará extensible ao profesorado que imparta esas ensinanzas.

Nos espazos nos que se imparta a citada formación e na documentación relacionada con esta ensinanzas, deberá aparecer o logotipo do FSE, coa lenda "O FSE inviste no teu futuro".

Santiago de Compostela, 4 de decembro de 2015

O DIRECTOR XERAL DE EDUCACIÓN, FORMACIÓN
PROFESIONAL E INNOVACIÓN EDUCATIVA



Manuel Corredoira López

Sr./Sra. Director/a do centro educativo